

M504: Mitteldeutsche Predigten (H2)

1r,1 [...] die daz fivr inbrennen fal. Daz ist ǃ tiufel. uñ alle sine uolgere.
 1r,2 die fulen eweliche brinnen in deme fivre. Von deme
 1r,3 fivre. ist gescriben.: “Ignis eoꝝ ñ extinguetur. & uermis eoꝝ
 1r,4 ñ morietur.” Der ubelen fivr. wirt nimer verleschet. uñ [ǃ]
 1r,5 wurm der irstirbet nimer. Lieben. Der ubele wurm.
 1r,6 deist der leide tivfel. der sie fal nagen. uñ marteren. naht
 1r,7 uñ tac. Daz wir da sprechen. naht. uñ tac. daz sprechen wir.
 1r,8 umme daz niht. daz da iemer werde tac. oder tages liecht
 1r,9 da daz ewige vinsternisse ist. wande ez ist also gesprochen
 1r,10 daz ir ungenade. iemer mer. weren fal. Nv fulen wir *bude*
 1r,11 biten unferen herren. der durch unfich. in dise werlt *w[ol]de*
 1r,12 kumen. daz er unf des volle helfe. daz wir dar muzen *k[umen]*
 1r,13 da er die ewigen genade bereidet hat. allen finen holde[n][.]
 1r,14 die in minnent. Lieben. Div uffart unfere herren. die
 1r,15 waf bezeichnenet. manege wif. in der heiligen scrifde. *dannen*
 1r,16 abe sp^ach ǃ wif salomon. in eineme buche. daz er gemacht
 1r,17 hade. von unferme herren. uñ uon der heiligen
 1r,18 cristenheide.: “Similis fact⁹ ē dilect⁹ m̃s capree hinnuloq;
 1r,19 ceruoꝝ sup montes aromatū.” Lieben. Min liebe. ǃ ist gelich
 1r,20 worden. eime rehe. uñ eime hint chalbe. uff deme
 1r,21 berge guter wurze. Daz reh. uñ daz hintchalp. daz sint
 1r,22 zuei snelliv dier. uñ varent al mit sprungen. uñ weidenent
 1r,23 gerne. an den bergen. Lieben. Daz brzeichnenet unferen
 1r,24 herren. des snellecheit. div ist groz. wande minner
 1r,25 wilen. danne ein ouc brawe die anderen berure. so umme wert.
 1r,26 unfer herre. alle die werlt. mit finer wifheide.
 1r,27 Also da gescriben ist. “Attingit afine usq; ad finem fortiter
 1r,28 & disponit om̃ia svauiter.” Er trifft uon eineme
 1r,29 ende der werlte. uñ aller der dinge. die er geschaffen hat
 1r,30 biz an daz. ander ende. stanche. uñ sezzet allez ze faze gemehliche.
 1r,31 Sine sprunge. waren feltzene. daz waf [ei]ner
 1r,32 von deme himele. indise werlt. durhc unfere *fund[e][.]* Der
 1r,33 ander an daz cruce. da er sine hende. an stracte. uñ die
 1r,34 durhcslagen wurden. mit nagelen. uñ da mite. gewan
 1r,35 er den namen. Quod est sup om̃e nom. Der da ist uber
 1r,36 alle namen. daz er ein herre ist geheizen des himeles

1v,1 [...]

- 2r,1 “[...] in ǃ ewigen verluft. wande du def wandef. daz man die genade
 2r,2 def heiligen geistef. folte koufen. uñ verkoufen. Din herze ist” sp^ach
 2r,3 er “vol aller unreinecheite. uñ div bittere galle. def unrechtes.
 2r,4 div hat dich betalle irwullet.” Lieben. also wart er verraden
 2r,5 uñ sider malef. swa er scē petrif werke iht vernam. da schalt
 2r,6 er in. uñ sprach. er were ein trigere. uñ ein bose vischere. Do ǃ
 2r,7 selbe tivfeles bote. dar quā. do tet er manic zeichenlich zouß.
 2r,8 da die houbet stunden ir graben. in den fulen. da schaffeter. daz
 2r,9 die livte duchte. daz sie lebeten. Die er wolte stecken. die stec=ket
 2r,10 er. allen gahef. daz sie von ǃ stat. niht kumen mohten. uñ
 2r,11 machte sich ungesichtlich. uñ ver swant den luten under den
 2r,12 handen. uñ ver maz sich def. daz er die toten wolde ir quicken.
 2r,13 uñ ander manic dinc tete. die die lute. wunderlich duchten.
 2r,14 Scē peter vñ fante pauluf. die newurben niht. mit decheiner
 2r,15 trugene. sie taten die toten uf sten. in unseres hren namen.
 2r,16 uñ mahten die sichen gesunt. uñ pdigiten aller tegelichef.
 2r,17 daz godesf wor[t]. uñ sp^achen. swer sich an zoubere. icht hefte.
 2r,18 ǃ muhte gotes hulde. verlorn han. Alfuf hub sich in der stat.
 2r,19 ze rome. michel gezoc. uñ wurfnisse. uñ zweiunge. under
 2r,20 deme livte. Sumeliche volgeten scē petro. uñ scē paulo. die
 2r,21 god ir kanten. den aber idelheit. lip waf. die wolgeten deme
 2r,22 goukelere. Diz quā do fur den keiser ze rome. ǃ hiez nero.
 2r,23 uñ waf untüre. def libes. uñ unreine def mutes. umme die
 2r,24 fele. so nehat er decheine achte. Er waf ungestalt. er schilhete.
 2r,25 er waf kale. uñ hate eine andere unreinecheit. die die
 2r,26 buch heizent. “Erinā intestinoꝝ scilicet demissionē.” Er sluc
 2r,27 sine muter. uñ sinen bruder. uñ sinen meister. senecā. unde
 2r,28 lucanum poetam. uñ die burc. hiez er instecken in zwelif
 2r,29 enden. mit fiure. durch anderes nit mere. wande durch sine
 2r,30 geluft. die eldesten uñ die bevesten. die ze rome waren. den
 2r,31 nam er den lip. unschuldic. mit verretnisse. Nie mochte.
 2r,32 geborn werden. fulich hurere. fulich vraz. fulich trenkere.
 2r,33 uñ aller bosheite. waf er vol. ǃ waf do ze rome keiser. uñ daz
 2r,34 riche. waf mit ime gelafteret. uñ verschelchet. Der hiez
 2r,35 do fur sich gewinnen. symonem den zoubere. uñ scē Petrū.
 2r,36 uñ scē paulū. uñ sp^ach zu in allen drin. “Ir hren. waz ist daz

 2v,1 [...] ir daz livt verirret.”
 2v,2 do sp^ach symon ǃ zoubere. “herre keiser uon rome. dise zwene
 2v,3 diz sint trugere. der eine ist ein vischere. uñ ǃ ander ist ein claffere
 2v,4 vñ varint fuf after lande vñ verkern das volk vñ bredigent
 2v,5 daz ǃ god were ir meister den die ivden crvcigeten ze ierlm̄.”
 2v,6 Des antworte scē petir uñ sp^ach. “[herre] *keiser* [lezzif][tu] disen zoubere
 2v,7 iht langer leben er verluset dir din ere uñ din fele.
 2v,8 [...] wande ǃ tivfel sin meister ist. [...] mit def helfe betruget
 2v,9 er die werlt. Wiltu aber wizen wer unser meister were
 2v,10 iħc xp̄c. ǃ werliche godesf svn ist. uñ der [...] in die werlt

- 2v,11 quā daz er unfich erlofte. uñ tet uil manic zeichen [...]
 2v,12 [...] uñ ð zv iungeft gemartelt
 2v,13 wart durh unfere funde. niht durch die fin. Ob du daz
 2v,14 allez uil rechte wilt wizzen foheiz dir den brief lefen den pilatuf
 2v,15 fande deme keifer claudio dime vorfaren uñ an deme
 2v,16 brieve [macht][u] [vernemen] [w] [vnfer] [meister] [were]” Do hiez ð keifer
 2v,17 den brief lefen. Do ern vernam do fp^ach er fymon deme zovberere
 2v,18 zv. “waz fp^richet du fymon.” Do fp^ach Symon. “Ez ift allez
 2v,19 ein lugene. daz dife fagent [...]. Ich bin werliche
 2v,20 gotef fun uñ wil dir din riche feſte machen. uñ nah deme
 2v,21 libe wil ich dich zvhimele furen.” Do fp^ach fce peter
 2v,22 du biſt des tíufeleſ bote dv biſt gotef fvn nicht daz wil ich
 2v,23 bewerren vor deme keifere [...] deme ift alliz
 2v,24 daz offen. uñ kundic. daz in ð werlte ift [uñ] [weiz] wole
 2v,25 allez daz der menifche gedenket. Ob du nu godef fun biſt.
 2v,26 fo fage deme keifere. wef ich nu gedenke. uñ [...] fo wil
 2v,27 ich deme keifere allir ereft mine gedanke fagen. den worten.
 2v,28 daz du decheine lugene getun mugeft. Do runete fente
 2v,29 peter deme keifer in fin ore [...]
 2v,30 [...] brot brin[gen] [...]
 2v,31 [...]
 2v,32 [...]
 2v,33 [...]
 2v,34 [...]
 2v,35 groze hunde uñ vrezzen peter [...]
 2v,36 [qu]amen groze hunde uñ [...]